

內癰

素問曰肝滿腎滿肺滿皆實即為腫

王注云滿謂脈氣滿實腫謂癰

腫肺之癰喘而兩胛滿

仲景云肺癰吐膿如米粥咽燥振寒

肝癰兩胛

滿卧則驚不得小便

腎癰脚下至小腹滿

大奇論

脚下當作胫下○千金云腸癰之為病小腹腫強按則痛便數似淋仲景云腸癰小腹痞堅蓋小腹腫痛而

痞堅者腎癰也小便數而似淋者腸癰也即肺癰肝癰之屬

胃脘癰人逆脉逆而盛

全文見後胃脘癰條

辨藏府內瘡

中府隱隱痛者肺疽

其上肉微起者肺癰

巨闕隱隱痛者心疽

其上肉微起者心癰

期門隱隱痛者肝疽

其上肉微起者肝癰

章門隱隱痛者脾疽

其上肉微起者脾癰

京門隱隱痛者腎疽

其上肉微起者腎癰

中脘隱隱痛者胃疽

其上肉微起者胃癰

天樞隱隱痛大腸疽

其上肉微起大腸癰

丹田隱隱痛三焦疽

其上肉微起三焦癰

關元隱隱痛小腸疽

其上肉微起小腸癰

懷忠丹

治內癰有敗膿敗血腥穢殊甚所致臍腹

冷痛用此推膿下血

白芷

單葉紅蜀葵花根

各壹兩

白礬枯

白芍藥各伍錢

右研為末，鎔黃蠟丸如梧子大，空心米湯下，叁拾丸。推膿下血出盡後服，十宣散補之。忌發物。又方：豬膏。

煎鱖魚食治腸癰，又方以鼈甲燒存性末服之。

肺癰 丹溪云：癰疽發於內者，肺癰、肝癰、腎癰、腸癰、囊

內癰、附骨癰。惟肺癰須先解表，今表而出之。

千金欬唾膿血，其脉數實者為肺癰。若口中欬，即胃中隱痛，脉反滑數，此肺癰也。問曰：病者欬逆，何以知其肺癰？當有膿血吐之，則死。其脉何如？曰：寸脉微而數，微為風，數為熱。微則汗出，數則惡寒。風中於衛

呼氣不入熱逼於榮吸氣不出風傷皮毛熱傷血脈
風舍於衛其人則欬口乾喘滿咽燥不渴多吐濁沫
時時振寒熱之所過血為凝滯蓄結癰膿吐如米粥
始萌可救膿成則死 問曰振寒發熱寸脉滑數其
人飲食起居如故此為癰腫醫反不知以傷寒治之
不應何以知有膿膿之所在何以別知其處師曰假
令膿在胸中者為肺癰其脉數欬吐有膿血設膿未
成其脉自數緊去但數為膿已成也 **薛**夫肺者五
臟之華蓋也處於胸中主於氣候於皮毛勞傷氣血
腠理不密外邪所乘內感於肺或入房過度腎水虧

損虛火上炎或醇酒炙燖辛辣厚味薰蒸於肺或咳
唾痰涎汗下過度重亡津液之所致也其候惡風咳
嗽鼻塞項強胸脇脹滿呼吸不利咽燥作渴甚則四
肢微腫咳唾膿血若吐痰臭濁膿血腥穢胸中隱隱
微痛右手寸口脉數而實者爲肺疽若唾涎沫而無
膿脉數而虛者爲肺痿也若咳嗽喘急者小青龍湯
咳嗽胸脹者葶蘆大棗瀉肺湯咳嗽膿腥濁者桔梗湯
咳喘短氣或小便短少者佐以參芪補肺湯體倦食
少者佐以參朮補脾湯咳嗽唾痰壅者腎虛水泛也六
味地黃丸口乾咽燥者虛火上炎也加減八味丸此

症皆因脾上虧損不能生肺金肺金不能生腎水故
始萌則可救膿成則多死若瘰微緊而數者未有膿
也緊甚而數者已有膿也內經曰血熱則肉敗榮衛
不行必將爲膿大凡肺癆咳唾膿血久久如粳米粥
者難治若唾膿而不止者亦不可治也其嘔膿而自
止者自愈其脉短而溢者白瘰面色當白而反赤者
此火之尅金皆不可治苟能補脾肺滋腎水庶有生
者但恐專攻其瘡脾胃益虛鮮有不誤者矣

丹溪治一少婦胸膈間潰一竅膿血與口中所咳相
應而出以參芪當歸加退熱排膿等藥而愈一云此

因肺痿所致 項彥章治一人病胸膈壅滯昏不知
人項以杏仁薏苡之劑灌之立甦繼以升麻枯梗黃
芪消其膿服之踰月瘳項所以知其病者以陽明脉
浮滑陰脉不足也浮爲火而滑爲血聚始由風傷肺
故結聚客于肺陰脉之不足則過于宣逐也諸氣本
乎肺肺氣治則出入易逆陳除故行其肺氣而病自
已 汪石山治一婦年近三十形色瘦白素時或咳
嗽一兩聲月水或前或後夏月取涼遂咳甚不能伏
枕者月餘嗽痰中或帶血或兼膿嗽急則吐食醫用
芩連二陳不效復用參芪等補藥病重汪視左脉浮

滑右脉稍弱而滑幼傷手腕掌不能伸右脉似難憑
矣乃以左脉驗之恐妊兼肺癰也遂以清肺泄肺之
劑進之三服而能著枕痰不吐膿不咯惟時或惡阻
汪曰此妊之常病也教用薏苡仁白朮茯苓麥冬黃
芩阿膠煎服病減月餘復爲診脉皆稍緩而浮曰熱
已減矣但吐紅太多未免傷胃教用四君子加陳皮
黃芩枳殼煎服調理妊至六月食雞病作却雞而愈
至九月病又復作聲啞令服童便獲安汪曰產後病
除乃是佳兆病若復作非吾所知月足而產脾胃病
作加泄竟不救薛立齋治一儒者患肺癰鼻流清

涕咳唾膿血胸膈作脹此風邪外傷也先用消風散
加亂髮灰二服而鼻利又用四君加芎歸及桔梗湯
而愈後因勞役咳嗽吐膿小便滴瀝面色黃白此脾
土不能生肺金肺金不能生腎水也用補中益氣湯
六味地黃丸而愈 一儒者因素善飲咳膿項強皮
膚不澤此脾肺氣虛外邪所乘而成肺癰也先用桔
梗湯後用人參補肺湯而痊 一男子咳唾痰膿胸
腹膨脹兩寸與右關脈皆洪數此火不能生土而土
不能生金也用桔梗湯為主佐以補中益氣湯而愈
一人不時咳嗽作汗自汗發熱便數自用清肺降

火理氣滲利之劑。凡之反小便不通面目赤色唇烈
痰壅脾肺腎三脉浮大按之而數此足三陰虧損不
能相生當滋化源否則成癰矣不信仍用分利之藥
後果患肺癰余用桔梗湯及六味丸而愈。一男子
面赤吐膿發熱作渴煩躁引飲脉洪數而無倫次先
用加減八味丸加麥門六劑一服熱渴頓止卽熟睡
良久覺而神爽索食再劑諸症頓減仍用前藥更以
人參伍錢麥門貳錢伍分五味貳錢水煎代茶飲月
一劑月餘而安此證面赤者當補脾腎面白者當補
脾肺治者驗之。一婦妻示血虛發熱咳嗽或用痰火

之劑後吐膿血面赤脉數甚勢甚危此膿成而血氣
虛也余用八珍湯以補元氣用桔梗湯以治肺症脉
症漸愈一婦感冒風寒或用發表之劑反咳嗽喘
急飲食少思胸膈不利大便不通右寸關脉浮數欲
用通利之劑余曰此因脾土虧損不能生肺金若更
利之復耗津液必患肺癰矣不信仍利之虛證悉至
後果吐膿予朝用益氣湯夕用桔梗湯各數劑吐膿
漸止又朝仍用前湯夕用十全大補湯各五十餘劑
喜其善調理獲愈一婦咳嗽吐痰胸膈作痛右寸
關浮滑項下牽強此胃積熱成痰非癰患也以二

先解
表文
取膿
終補
裏

陳湯加山梔白朮桔梗治之而痊 一婦素血虛內
熱時咳甲辰孟冬兩月并洪余曰當防患肺症丙午
孟春果咳嗽左右寸脈洪數此心火刑剋肺金而成
肺癰也膿已成矣夏令可憂余用壯水健脾之劑稍
愈彼不慎調攝果歿於仲夏

小青龍湯 治肺受風寒咳嗽喘急

半夏

湯泡三次
貳兩半

乾薑

炮

細辛

麻黃

去節

肉桂

芍藥

甘草

炙各
參兩

五味子

蜜拌炒
貳兩

右每服伍錢薑水煎服

葶藶大棗瀉肺湯

治肺癰喘不得卧

葶藶

炒黃研細
丸如彈大

大棗

拾貳枚

水參升入棗先煮取貳升去棗入葶藶又煮壹升
頓服之又曰治肺癰胸滿脹一身并面目浮腫鼻
一塞清涕出不知香臭酸辛咳逆上氣喘鳴迫塞用
一前方三日一劑可至三四劑須先與小青龍湯一
劑乃與之

桔梗湯

治欬而胸滿振寒脉數咽乾不渴時出濁

唾腥臭久久吐膿如癰者肺癰也

桔梗

甘草

炙各
壹兩

用水參升煮取壹升去滓分溫再服則吐膿血也
亦治喉痺三四甘艸倍之每肆錢名四聖散千金
亦名桔梗湯用桔梗參兩甘艸貳兩服後必吐膿
血

葦莖湯 治肺癰又云一本治欬有微熱煩滿心胸

甲錯

葦莖 參升切 薏苡仁 半升 冬瓜仁 半升

桃仁 伍拾枚 去皮

用水壹斗先煮葦葉得伍升去滓入諸仁煮取貳
升分溫五服當吐如粥千金云肺癰當吐膿血○葦莖卽汀洲間蘆荻之粗

種也

治吐膿血如肺癰狀口臭他方不應者宜消風散入

男子髮灰研細入和之清米飲下可除根只兩服

亦治吐血

消風散方荆芥川芎羌活人參茯苓僵蚕防風藿香蟬蛻各貳錢厚朴陳皮各

半兩為末是也

韋宙獨行方

治心胸甲錯為肺癰黃昏湯主之

用夜合皮掌大壹片水叁升煮取貳升分再服夜合

樹按本草即烏農樹也

右肺癰證治要略以小青龍湯先與一劑乃行氣

取膿之藥將以解表之風寒邪氣此治腫瘍之例

也後以韋宙方終之者將以補裏之陰氣此治潰

瘍之例也

已上六十六言
丹溪所集

如聖丸

梅師

治風熱毒氣上攻咽喉痛痺腫塞妨悶

及肺癰喘嗽唾膿血胸滿振寒咽乾不渴時出濁沫氣臭腥穢久久咯膿狀如米粥

樟腦

另研

牛黃

另研

桔梗

甘草

生用各壹錢

爲細末煉蜜丸每兩作貳拾丸每用壹丸嚥化

濟生桔梗湯

治肺癰心胸氣塞咳嗽膿血心神煩

悶咽乾多渴兩足腫滿小便赤黃大便多澀用桔

梗貝母川歸瓜蒌仁枳殼薏苡仁桑白皮防風已
上各壹兩生甘艸杏仁蒸百合各半兩黃芪壹兩
半右修事咬咀每服肆錢水壹碗半生薑伍片煎
至捌分去滓服若大便秘加大黃小便秘加木通
仲景桔梗白散治欬而胸滿振寒脉數咽乾不渴
時出濁唾腥臭又吐膿如米粥者為肺癰

桔梗

貝母 各叁分

巴豆 去皮炒研如脂壹分

右三味為散強人飲黑牛錢匕羸者減之病在膈
上者吐膿血膈下者瀉出若下多不止飲冷水二

碗則定

此藥要製方寸散不刪採用之者以有微意存焉